

Les dgendârmes

(poi ci Michel Boillat, l' vinte de djuîn 2013)

È y aivait in còp, poi D'lémont, in dgendârme que f'sait bîn son métié. È n' léchait ran péssaie. An l' coégnéçait bîn pe an se t'niait piaîn d'vaint lu. Te sais aich'bîn qu' moi qu' an n' sairait déçendre le crâs è vélo, hein ! Bon, voili qu' in djo, note dgendârme se trovait pai d'vaint l' « Démocrate » tiaind qu' è voiyé airrivaie en vélo, in capuçîn. Son saing ne f'sé ran qu' in to. L' dgendârme, c' était bîn chur in bon caitholitçe, mains tot d' meinme : in capuçîn en vélo aivâ l' crâs, muse-te voûere ! Ç'ti còp, mon pére, vòs n'y v'lèz p' copaié. Ç' ât défenju de v'ni ci en vélo ; çoli fait dieche fraincs.

Mains Mossieu l' dgendârme, i fais l' capuçîn, i n' sairòs djâsaie mit'naint daivô vòs. I v'raî en vote bureû aiprés.

C'ment, c'ment, mon pére ? Pe l' temps ? I voéròs bîn voûere çoli. Chi, ç' ât lai lei, vòs l' dairîns saivoi.

Bon, bon, d'aiccoûe, mains i seus roid'ment preuchie.

Poquoi ?

I poétche le Bon Dûe en ène poûere véye qu' ât prâte de meuri.

Ah !

Vòs comprentes, mon fé ! I seus aivô l' Bon Dûe.

Mains sakeurdie, mon pére, ç' ât encoé pé. Çoli veut faire vinte fraincs...

Aîye ! Vinte fraincs, an n' viaidge pe dous chus l' meinme vélo.